

# Anak muda tak sanggup lakukan penyembelihan?



MOHAMAD Hilmi Mat Said (kanan) menunjukkan cara penyembelihan haiwan ternakan mengikut syariat Islam sambil diperhatikan peserta kursus yang terdiri daripada kalangan pelajar dan staf UMP di Kuantan, Pahang, baru-baru ini.

KUANTAN 23 Nov. – Seramai 60 peserta yang terdiri daripada pelajar dan kakitangan Universiti Malaysia Pahang (UMP) berpeluang mengikuti kursus penyembelihan haiwan di Kampus Gambang universiti tersebut dekat sini baru-baru ini.

Pengarah Pusat Islam dan Pembangunan Insan (Pipi), Dr. Hasan Ahmad berkata, kursus tersebut bertujuan mendidik generasi muda supaya lebih berani dan yakin dalam melakukan kerja-kerja penyembelihan ternakan mengikut kaedah yang menepati tuntutan syariat Islam.

"Kebanyakan anak muda hari ini hanya bergantung harap kepada generasi tua dan tidak ramai yang boleh dan sanggup melakukan penyembelihan.

"Sehinggalah ada sesetengah tempat sukar untuk mendapatkan orang yang benar-benar yakin boleh melakukan sembelihan," katanya ketika ditemui pada program tersebut.

Program itu dipimpin pensyarah Pusat Bahasa Moden dan Sains Kemanusiaan (PBMSK) UMP, Mohamad Hilmi Mat Said.

Kursus tersebut merupakan anjuran bersama Pipi dengan Sahabat Masjid (Saham), Perwakilan Mahasiswa Kolej Kediaman 2 (Peka2) dan Biro Kerohanian Surau Kolej Kediaman 2.

Pada program tersebut, sebanyak 50 ekor ayam dan seekor kambing disediakan untuk memberi peluang kepada peserta kursus

mempraktikkan sendiri cara menyembelih ternakan mengikut syariat.

Menurut Hasan, faktor pemakanan halal merupakan salah satu ciri utama dalam pembentukan fizikal yang sihat dan perkembangan minda serta hati manusia.

Justeru itu, tegas beliau, pengetahuan yang tepat dan jelas mengenai kaedah-kaedah penyembelihan mengikut syariat amat penting memandangkan ia berkait rapat dengan faktor kesihatan.

Selain itu tambahnya, penganjuran program tersebut dapat memupuk nilai-nilai murni di kalangan warga kerjanya.

Menurut beliau, para peserta kursus terbahit tidak hanya mempelajari teori dan praktikal untuk menyembelih ternakan malah mereka digalakkan berpuasa sunat seterusnya menikmati juadah berbuka puasa di masjid UMP.

Sementara itu, pelajar Fakulti Kejuruteraan Awam dan Sumber Alam (FKASA), Md. Khusairi Baharun berkata, program yang julung kali diadakan itu amat berguna terutama kepada generasi muda yang kurang berpengetahuan dalam kaedah penyembelihan yang betul.

Katanya, program itu sekali gus dapat mengeratkan hubungan dan mendidik nilai-nilai murni di kalangan warga UMP serta mempraktikkan segala yang dipelajari.